

四庫全書

子部

欽定四庫全書

子部

太平廣記卷五十一

詳校官中書臣潘有為

侍讀臣孫琰覆勘

總校官進士臣楊懋珩

校對官典簿臣汪日贊

謄錄監生臣許立望

謄錄監生臣姜今熙

欽定四庫全書

太平廣記卷五十一

神仙五十

侯道華

宣君王光

陳師

陳金

侯道華

河中永樂縣道淨院居蒲中之勝境道士寓居有以十數唐文宗時道士鄧大玄錄丹於藥院中藥成疑功未

究留貯院內人共掌之太玄師門徒周悟仙主院事時有蒲人侯道華事悟仙以供給使諸道士皆奴畜之灑掃隸役無所不為而道華愈欣然又常好子史手不釋卷一覽必誦之於口衆或問之要此何為答曰天上無愚懵仙人咸大笑之蒲中多大棗天下人傳歲中不過一二無核者道華比三年輒得啗之一旦道華執斧科古松枝垂且盡如削院中人無喻其意明日昧爽衆晨起道華房中亡所見古松下施案致一盃水仍脫雙履

案前道華衣掛松上院中視之中留一首詩云帖裏大
還丹多年色不移前宵盜喫却今日碧空飛慙愧深珍
重珍重鄧天師他年鍊得藥留著與內芝吾師知此術
速鍊莫為遲三清專相待大羅的有期下列細字稱去
年七月一日蒙韓君賜姓李名內芝配住上清善進院
以次十數言時唐大中五年五月二十一日院中人方
驗道華竊太玄藥仙去因相率白節度使尚書鄭公光
按視踪跡不誣即以其事聞奏詔齋絹五百疋並賜御

衣修飾廊殿賜名昇仙院

出宣室志

宜君王老

王老坊州宜君縣人也居於村墅頗好道愛客務行陰德為意其妻亦同心不倦一旦有藍縷道士造其門王老與其妻俱延禮之居月餘間日與王老言談益酌甚相歡狎俄患遍身惡瘡王老乃求醫藥看療益加勤切而瘡日甚逮將逾年道士謂王老曰此瘡不煩以凡藥相療但得數斛酒浸之自愈於是王老為之精潔釀酒

及熟道士言以大瓮盛酒吾自加藥浸之遂入瓮三日
方出鬚髮俱黑面顏復少年肌若凝脂王老闔家視之
驚異道士謂王老曰此酒可飲能令人飛上天王老信
之初瓮酒五斛餘及窺二三斗存耳清冷香美異常時
方打麥王老與妻子並打麥人共飲皆大醉道士亦飲
云可上天去否王老願隨師所適於是祥風忽起綠雲
如蒸屋舍草樹全家人物雞犬一時飛去空中猶聞打
麥聲數村人共觀望驚歎唯猫棄而不去風定其傭打

麥二人乃遺在別村樹下後亦不食皆得長年宜君縣

西三十里有昇仙村存焉

出續仙傳

陳師

豫章逆旅梅氏頗濟惠行旅僧道投止皆不求直恒有一道士衣服藍縷來止其家梅厚待之一日謂梅曰吾明日當設齋從君求新瓷碗二十事及七筋助君亦宜來會可於天寶洞前訪陳師也梅許之道士持碗渡江而去梅翌日詣洞前問其村人莫知其處久之將迴偶得

一小逕甚明淨試尋之果見一院有青童應門問之乃陳之居也入見道士衣冠華楚延與之坐命具食頃之食至乃熟蒸一嬰兒梅懼不食良久又進食乃蒸一犬子梅亦不食道士歎息命取昨所得椀贈客視之乃金椀也謂梅曰子善人也然不得仙千歲人參枸杞皆不肯食乃分也謝而遣之比不復見矣

出稽神錄

陳金

陳金者少為軍士隸江西節度使劉信圍虔州金私與

其徒五人發一大冢開棺見一白鬚老人面如生通身
白羅衣衣皆如新開棺即有白氣衝天墓中有非常香
氣金獨視棺蓋上有物如粉微作硫黃氣金素聞棺中
硫黃為藥即以衣襟掬取懷歸墓中無他珍寶即共掩
塞之而出既至營中營中人皆驚云今日那得有香氣
金知硫黃之異旦輒汲水服之至盡城中入舍僧寺偶
與寺僧言之僧曰此城中富人之遠祖也子孫相傳其
祖好道有異人教餌硫黃云數盡當死死後三百年墓

當開即解化之期也今正三百年矣即相與復視之棺
中空唯衣尚存如蟬蛻之狀金自是無病今為清海軍
小將年七十餘矣形體枯瘦輕健如故

出稽
神錄

太平廣記卷五十一

欽定四庫全書

太平廣記卷五十二

神仙五十二

陳休復

殷天祥

閻丘子

張卓

陳休復

陳休復者號陳七子貞元中來居褒城耕農樵採與常無異如五十許人多變化之術褒人有好事少年承奉

之者五六人常為設酒食以求學其術勤勤不已休復約之曰我出西郊行及我者授以術休復徐行羣少年奔走追之終不能及遂止無得其術者後入市衆復奉之不已休復與出郊外坐大樹下語道未竟忽然暴卒須臾臭敗衆皆驚走莫敢迴視自此諸少年不敢干之常狂醉市中褒帥李謙怒而繫於獄中欲加其罪桎梏甚嚴忽不食而死尋即臭爛虫蛆流出郊外旋亦還家復在市中讜時加禮異為築室於褒城江之南岸遺與

甚夕略無受者河東柳公仲郢相國周墀燕國公高駢擁旄三州皆威望嚴重而深加禮敬書幣相屬休復亦無所受唯鶴氅布裘受而貯之亦未嘗衣著也昌明令胡倣常師事之將赴任留錢五千為復休市酒笑而不取曰吾金玉甚多恨不能用耳以鋤授倣使之劙地不二三寸金玉錢貨隨劙而出曰人間之物固若是矣但世人賦分有定不合多取若吾用之豈有限約乎倣之昌明休復祖之于仙流江上指砂中令倣取酒器倣

攫砂數寸得器皿五六事飲酒畢復埋砂中又戲曰吾
於砂中嘗藏菓子今亦應在又令取之皆得蜀相燕公
使人致書至褒城所居延召休復同日離褒城使人經旬
方達休復當日已至成都而有一休復與使者偕行
未嘗相捨燕公詰於使者益奇待之常於巴南太守筵
中為酒妓所侮休復笑視其面須臾妓者鬚長數尺泣
訴於守為祈謝休復呪酒一盃使飲之良久如舊又有
藥一丸投水中沉浮旋轉任人指呼變化隱顯其類極

多不可備載光啟元年大駕還京休復亦至闕下田晉
公軍容問至京國幾年安寧曰二十果自問後二十日
再幸陳倉後於道中寄詩與田晉公曰夜坐空庭月色
微一樹寒梅發兩枝及駕至梁洋邠帥朱玫立襄王監
國寒梅兩枝驗矣自是衛駕詣都多在西縣三泉褒斜
以來屯駐休復之術素為人所傳俄為人釘其手於柱
上尋有人救而拔之竟亦無患歲餘卒於家葬於江南
山下數月好事者掘其墓無復所有見休復在長安駕

駐華州休復亦至興德府矣

出仙傳拾遺

殷天祥

殷七名天祥又名道筌嘗自稱七七俗多呼之不知何所人也遊行天下人言久見之不測其年壽面光白若四十許人到處或易其姓名不定曾於涇州賣藥時靈臺蕃漢疫癘俱甚得藥者入口即愈皆謂之神聖得錢却施於人又嘗醉於城市間周寶舊於長安識之尋為涇原節度延之禮重慕其道術房中之事及寶移鎮

浙西數年後七七忽到復賣藥寶聞之驚喜召之師敬
益甚每日醉歌曰彈琴碧玉調藥鍊白朱砂解醞頃刻
酒能開非時花寶常試之悉有驗復求種瓜釣魚若葛
仙翁也鶴林寺杜鵑高丈餘每春末花爛熳寺僧相傳
言貞元中有外國僧自天台來盂中以藥養其根來種
之自後構飾花院鑠閉時或窺見三女子紅裳豔麗其
遊樹下人有輒採花折枝者必為所祟俗傳女子花神
也是以人共寶惜故繁盛異於常花其花欲開探報分

數節使賓僚官屬繼日賞翫其後一城士女四方之人無不載酒樂遊縱連春入夏自旦及昏閭里之間殆于廢業寶一日謂七七曰鶴林之花天下奇絕常聞能開非時花此花可開否七七曰可也寶曰今重九將近能副此日乎七七乃前二日往鶴林宿焉中夜女子來謂七七曰道者欲開此花邪七七乃問女子何人深夜到此女子曰妾為上玄所命下司此花然此花在人間已逾百年非久即歸閬苑去今與道者共開之非道者無

以感妾於是女子暫然不見來日晨起寺僧忽訝花漸
拆蕊及九日爛熳如春乃以聞寶與一城士庶驚異之
遊賞復如春間數日花俄不見亦無落花在地後七七
偶到官僚家適值賓會次主與賓趨而迎奉之有佐酒
倡優甚輕侮之七七乃白主人欲以二栗為令可乎咸
喜謂必有戲術資於歡笑乃以栗巡行接者皆聞異香
驚歎唯佐酒笑七七者二人嗅之化作石綴於鼻掣拽不落但
言穢氣不可堪二人共起狂舞花鉏委地相次悲啼粉

黛交下及優伶輩一時亂舞鼓樂皆自作聲頗合節奏
曲止而舞不已一席之人笑皆絕倒久之主人祈謝於
七七有頃石自鼻落復為粟嗅之異香及花鉢粉黛悉
如舊畧無所損咸敬事之又七七酌水為酒削木為脯
使人退行指船即駐呼鳥自墜唾魚即活撮土畫地狀
山川形勢折茅聚蟻變成城市人有曾經行處見之歷
歷皆似但少狹耳凡諸術不可勝紀後二十年薛朗劉
浩亂寶南奔杭州而寶總戎為政刑殺無辜前上饒牧

陳全裕經其境構之以禍盡赤其族寶八十三筋力尤壯女妓百數盡得七七之術後為無辜及全裕作厲一
旦忽殂七七劉浩軍變之時甘露寺為衆推落北崖謂
墜江死矣其後人見在江西十餘年賣藥入蜀莫知所
之鶴林犯兵火焚寺樹失根株信歸閭苑矣出續仙傳

閭丘子

有榮陽鄭又玄名家子也居長安中自小與鄰舍閭丘
氏子偕讀書於師氏又玄性驕率以門望清貴而閭丘

氏寒賤者往往戲而罵之曰閭丘氏非吾類也而我偕學於師氏我雖不語汝寧無愧於心乎閭丘子嘿然有慚色後數歲閭丘子病死及十年又玄以明經上第其後調補參軍於唐安郡既至官郡守命假尉唐興有同舍仇生者大賈之子年始冠其家貲產萬計日與又玄會又玄累受其金錢賂遺常與讌遊然仇生非士族未嘗以禮貌接之嘗一日又玄置酒高會而仇生不得預及酒闌有謂又玄者曰仇生與子同舍會讌而仇生不

得預豈非有罪乎又玄慚即召仇生生至又玄以卮飲之生辭不能引滿固謝又玄怒罵曰汝市井之民徒知錐刀爾何為僭居官秩邪且吾與汝為伍實汝之幸又何敢辭酒乎因振衣起仇生羞且甚俛而退遂棄官閉門不與人往來經數月病卒明年鄭罷官僑居濬陽郡佛寺鄭常好黃老之道時有吳道士者以道藝聞廬於蜀門山又玄高其風即驅而就謁願為門弟子吳道士曰子既慕神仙當且居山林無為汲汲於塵俗間又玄

喜謝曰先生真有道者某願為隸於左右其可乎道士
許而留之凡十五年又玄志稍惰吳道士曰子不能固
其心徒為居山林中無補矣又玄即辭去謙遊濛陽郡
久之其後東入長安次褒城舍逆旅氏遇一童兒十餘
歲貌甚秀又玄與之語其辨慧千轉萬化又玄自謂不
能及已而謂又玄曰我與君故人有年矣君省之乎又
玄曰忘矣童兒曰吾嘗生閭丘氏之門居長安中與子
偕學於師氏子以我寒賤且曰非吾類也後又為仇氏

子尉於唐興與子同舍子受我金錢賂遺甚多然子未嘗以禮貌遇我罵我市井之民何吾子驕傲之甚邪又玄驚因再拜謝曰誠吾之罪也然子非聖人安得知三生事乎童兒曰我太清真人上帝以汝有道氣故生我于人間與汝為友將授真仙之訣而汝以性驕傲終不能得其道吁可悲乎言訖忽亡所見又玄既寤其事甚慚恚竟以憂卒

出宣室志

張卓

張卓者蜀人唐開元中明經及第歸蜀觀省唯有一驢衣與書悉背在上不暇乘但驅而行取便路自斜谷中數日將至洋州驢忽然奔擲入深箐中尋之不得天將暮又無人家欲宿林下且懼狼虎是夜月明約行數十里得大路更三二里見大宅朱門西開天既明有山童自宅中出卓問求水童歸逡巡見一人朱冠高履曳杖而出卓趨而拜之大仙曰觀子塵中之人何為至此卓具陳之仙曰有緣耳乃命坐賜杯水香滑清冷身覺輕

健又設美饌訖就西院沐浴以衣一箱衣之仙曰子骨未
成就分當留此某有一女兼欲聘之卓起拜謝是夕成禮
數日卓忽思家仙人與卓二朱符二黑符一黑符可置於
頭入人家能隱形一黑符可置左臂半里之內引手取
之一朱符可置舌上有不可却者開口示之一朱符可
置左足即能感地脉及拒非常然勿恃靈符自顛狂耳
卓至京師見一大宅人馬駢闐窮極華盛卓入之經數
門至廳事見鋪陳羅列賓客滿堂又於帳內粧飾一女

年可十五六卓領之潛於中門聞一宅切切之聲云相
公失小娘子具事聞奏勅羅葉二師就宅尋之葉公踏
步叩齒噴水化成一條黑氣直至卓前見一少年執女
衣襟右座一見怒極令前擒之卓因舉臂如抵牆壁終
不能近遽以狗馬血潑之又以刀劙擊刺之卓乃開口
鋒及斷續又勅使宣云斷頸進上卓聞而懼因脫左
鞋伸足推之右座及羅葉二師暨勅使皆仰仆焉葉公
曰向來入門見非常之氣及其開口果有太乙使者相

公但獲愛女何苦相害卓因縱女上使衛兵送歸舊山
仙人曳杖途中曰張郎不聽吾語遽遭羅網也侍衛兵
士尚隨之仙人以拄杖畫地化為大江波濤浩淼濶三
二里妻以霞帔搭於水上須臾化一飛橋在半天之上
仙人前行卓次之妻又次之三人登橋而過隨步旋收
但見蒼山四合削壁萬重人皆遙禮歸奏玄宗俄發使
就山祭醮之因呼為隔仙山在洋州西六十里至今存

焉

出會昌解頤錄

太平廣記卷五十二

欽定四庫全書

太平廣記卷五十三

神仙五十三

麒麟客

王法進

維揚十友

金可記

楊真伯

麒麟客

麒麟客者南陽張茂實客僕僕也茂實家於華山下唐
大中初偶遊洛中假僕於南市得一人焉其名曰王叟

年可四十餘傭作之直月五百勤幹無私出於深誠苟
有可為不待指使茂實器之易其名曰大歷將倍其直
固辭其家益憐之居五年計酬直盡一旦辭茂實曰夏
本居山家業不薄適與厄會須傭作以禳之固非無資
而賣力者今厄盡矣請從此辭茂實不測其言不敢留
聽之去日暮入白茂實曰感君恩宥深欲奉報夏家去
此甚近其中景趣亦甚可觀能相逐一遊乎茂實喜曰
何幸然不欲令家人知潛一遊可乎夏曰甚易於是截

竹杖長數尺其上書符授茂實曰君杖此入室稱腹痛
左右人悉令取藥去後潛置竹於食中抽身出來可也
茂實從之夏喜曰君真可遊吾居者也相與南行一里
餘有黃頭執青麒麟一赤文虎二候於道左茂實驚欲
迴避夏曰無苦但前行既到前夏乘麒麟茂實與黃頭
各乘一虎茂實懼不敢近曰夏相隨請不須畏且此物
人間之極俊者但試乘之遂憑而上穩不可言於是從
之上仙掌峰越壑凌山舉意而過殊不覺峻險如到三

更計數百里矣下一山物衆鮮媚松石可愛樓臺宮觀
非世間所有將及門引者揖曰阿郎何來紫衣吏數百
人羅拜道側既入青衣數十人容色皆殊衣服鮮華不
可名狀各執樂器引拜遂於中堂宴食畢且命茂實坐
更衣返坐衣裳冠冕儀貌堂堂然實真仙之風度
也其窟戶階闌屏幃茵褥之盛固非人世所有歌鸞舞
鳳及諸聲樂皆所未聞情意高逸不復思人寰之事歡
極主人曰此乃仙居非世人所到以君宿緣合一到此

故有逃厄之遇仙俗路殊虛靜難雜君宜歸修其心三
五劫後當復相見質比者塵緣將盡上界有名得遇太
清真人名入小有洞中示以九天之樂復令下指生死
海波且曰樂雖難求苦亦易遭如為山者掬土增高不
掬則止穿則陷夫昇高者不上難而下易乎自是修習
經六七劫乃證此身迴視委骸積如山岳曰大海水半
是吾宿世父母妻子別泣之淚然念念修之倏已一世
形骸雖遠此不忘修致其功即亦非遠亦時有心遠氣

清一言而悟者勉之遺金百鎰為營身之助復乘麒麟
令黃頭執之夏步送到家家人方環泣茂實投金於井
中夏抽去竹杖令茂實潛卧衾中夏曰我當至蓬萊謁
大仙伯明日蓮花峰上有綠雲車去我之乘也遂揖而
去茂實忽呻吟衆驚而問之茂實給之曰初腹痛時忽若
有人見召遂奄然耳不知其多少時也家人曰取藥既
迴呼之不應已七日矣唯心頭尚暖故未歟也明日望
之蓮花峰上果有綠雲遂棄官遊名山後歸出井中金

與眷屬再出遊山後不知所在也

出續玄怪錄

王法進

王法進者鮦州臨津人也幼而好道家近古觀雖無道士居之其嬉戲未嘗輕侮於像設也十餘歲有女冠自鮦州歷外邑過其家父母以其慕道託女冠以保護之與授正一延生小籙名曰法進而專勤香火齋戒護持亦茹柏絕粒時有感降時三川饑儉斛斗翔貴死者十五六多採野葛山芋以充饑急三青童降於其庭謂法

進曰上帝以汝夙稟仙骨歸心精誠不忘於道勅我迎汝受事於上京也不覺騰空逕達大帝之所命以玉盃霞漿賜之徐謂曰人處三才之大體天地之和得人形生中土甚不易也天運四時之氣地稟五形之秀生五穀百果以養於人而人不知天地養育之恩輕棄五穀厭捨絲麻使耕農之夫紡績之婦身勤而不得飽力竭而不禦寒徒施其勞曾無愛惜者斯固神明所責天地不佑矣近者地司岳瀆所奏以世人厭擲五穀不貴衣

食之本我已勅太華之府收五穀之神所種不成下民
饑餓因示罰責以懲其心然旋奉太上慈旨以大道好
生務先救物雖天地神明責之愚民不知其過所自固
無懺請首原之路汝當為上宮侍童入侍天府今且令
汝下歸於世告喻下民使其悔罪寶愛農桑此亦汝之
陰功也命侍女以靈寶清齋告謝天地儀一軸付之使
傳行於世曰令世人相率於幽山高靜之所致齋悔謝
一年再為之則宿罪可除穀父蠶母之神為致豐衍矣

龍虎之年復當召汝即今清齋天公告謝之法是也法進以天寶十二年壬辰遂復昇天

出仙傳拾遺

維揚十友

維揚十友者皆家產麤豐守分知足不干祿位不貪貨財慕玄知道者也相約為友若兄弟焉時海內大安民人胥悅遽以酒食為娛自樂其志始於一家周於十室率以為常忽有一老叟衣服淳弊氣貌羸弱似貧窶不足之士也亦著麻衣領十人來以造其會衆既適情亦

皆憫之不加斥逐醉飽自去莫知所之一旦言於衆曰
余力困之士也幸衆人許陪坐末以為責今十人置
宴皆得預之席既周畢亦願力為一會以答厚恩約以
他日願得同往至期十友如其言相率以待凌晨貧叟
果至相引徐步詣東塘郊外不覺為遠草莽中茆屋兩
三間傾側欲摧引入其下有丐者數輩在焉皆是蓬髮
鶴衣形狀穢陋叟至丐者相顧而起牆立以俟其命叟
令掃除舍下陳列蘧篠布以營席相邀環坐日既旰矣

咸有饑色久之各以醯鹽竹筋置於客前逡巡數輩共舉一巨板如案長四五尺設於席中以油帜幕之十友相顧謂必濟饑甚以為喜既撤油帜氣燁燁然尚未可辨久而視之乃是蒸一童兒可十數歲已糜爛矣耳目手足半已墮落叟揖讓勸勉使衆就食衆深嫌之多託以餫飽亦有忿恚逃去都無肯食者叟縱意冷啖似有盈味食之不盡即命諸丐擎去令盡食之因謂諸人曰此所食者千歲人參也頗甚難求不可一遇吾得此物

感諸公延遇之恩聊欲相報且食之者白日昇天身為
上仙衆既不食其命也夫衆驚異悔謝未及叟促問諸
丐令食訖即來俄而丐者化為青童玉女幡蓋導從與
叟一時昇天十友剝心追求更莫能見

出神仙遇傳

金可記

金可記新羅人也賓貢進士性沉靜好道不尚華侈或
服氣鍊形自以為樂博學強記屬文清麗美姿容舉動
言談迥有中華之風俄擢第隱於終南山子午谷葺居懷

隱逸之趣手植奇花異果極多常焚香靜坐若有思念
又誦道德及諸仙經不輟後三年思歸本國航海而去
復來衣道服却入終南務行陰德人有所求初無阻拒
精勤為事人不可偕也唐大中十一年十二月忽上表
言臣奉玉皇詔為英文臺侍郎明年二月二十五日當
上昇時宣宗極以為異遣中使徵入內固辭不就又求
玉皇詔辭以為別仙所掌不留人間遂賜宮女四人香
藥金綵又遣中使二人專伏侍者可記獨居靜室宮女

中使多不接近每夜聞室內常有客談笑聲中使竊窺之但見仙官仙女各坐龍鳳之上儼然相對復有侍衛非少而宮女中使不敢輒驚二月二十五日春景妍媚花卉爛漫果有五雲唳鶴翔鸞白鵠笙簫金石羽蓋瓊輪幡幢滿空仙仗極衆昇天而去朝列士庶觀者填隘山谷莫不瞻禮歎異

出續
仙傳

楊真伯

弘農楊真伯幼有文性耽翫書史以至忘寢食父母不

能禁止時或奪其脂燭匿其詩書真伯頗以為患遂逃過洪饒間於精舍空院肄習半年餘中秋夜習讀次可二更已來忽有人扣學窓牖間真伯淫於典籍不知也俄然有人啟扉而入乃一雙鬟青衣言曰女郎久棲幽隱服氣茹芝多往來洞庭雲水間知君子近至此又骨氣清淨志操堅白願盡欵曲真伯殊不應青衣自返三更後聞戶外玲瓏環珮之聲異香芳馥俄而青衣報女郎且至年可二八冠碧雲鳳翼冠衣紫雲霞日月衣精

光射人逡巡就坐真伯殊不顧問一言久之於真伯案
取硯青衣薦牋女郎書札數行懊然而去真伯因起乃
視其所留詩曰君子竟執逆無由達誠素明月海上山
秋風獨歸去其後亦不知女郎是何人也豈非洞庭諸
仙乎觀其詩思宜人間之言歟

出博異志

太平廣記卷五十三

欽定四庫全書

太平廣記卷五十四

神仙五十四

韓愈外甥

劉瞻

盧鈞

薛逢

費冠卿

沈彬

韓愈外甥

唐吏部侍郎韓愈外甥忘其名姓幼而落拓不讀書好飲酒弱冠往洛下省骨肉乃慕雲水不歸僅二十年杳

絕音信元和中忽歸長安知識闡草衣服淳敝行止乖
角吏部以久不相見容而恕之一見之後令於學院中
與諸表話論不近詩書殊若土偶唯與小臧賭博或廝
中醉卧三日五日或出宿於外吏部懼其犯禁陷法時
或覈之暇日偶見問其所長云善卓錢鍋子試令為之
植一鐵條尺餘百步內卓三百六十錢一一穿之無差
失者書亦旋有詞句以資笑樂又於五十步內雙鉤草
天下太平字點畫極工又能於爐中累三十斤炭支三

日火火勢常熾日滿乃消吏部甚奇之間其修道則玄
機清話該博真理神仙中事無不詳究因說小伎云能
染花紅者可使碧或一朶具五色皆可致之是年秋與
吏部後堂前染白牡丹一叢云來春必作含稜碧色內
含有金含稜紅間暈者四面各含有一朶五色者自剗
其根下置藥而後栽培之俟春為驗無何潛去不知所
之是歲上迎佛骨於鳳翔御樓觀之一城之人忘業廢
食吏部上表直諫忤旨出為潮州刺史至商山泥滑雪

深頗懷欝欝忽見是甥迎馬首而立拜起勞問扶鐙接
轡意甚慇懃至翌日雪霽送至鄧州乃白吏部曰某師
在此不得遠去將入玄扈倚帝峰矣吏部驚異其言問
其師即洪崖先生也東園公方使柔金水玉作九華丹
火候精微難於暫捨吏部加敬曰神仙可致乎至道可
求乎曰得之在心失之亦心校功銓善黜陟之嚴倣王
禁也某他日復當起居請從此逝吏部為五十六字詩
以別之曰一封朝奏九重天夕貶潮陽路八千本為聖

朝除弊事豈將衰朽惜殘年雲橫秦嶺家何在雪擁藍
關馬不前知汝遠來應有意好收吾骨瘴江邊與詩訖
揮涕而別行入林谷其速如飛明年春牡丹花開數朵
花色一如其說但每一葉花中有楷書十四字曰雲橫
秦嶺家何處雪擁藍關馬不前書勢精能人工所不及
非神仙得道立見先知何以及於此也或云其後吏部
復見之亦得其月華度世之道而迹未顯爾出仙傳拾遺

劉瞻

劉瞻音潛

小字宜哥唐宰相瞻之兄也瞻家貧好道嘗有

道士經其家見瞻異之乃問知道否曰知之某性饒俗

氣業應未淨遽可強學邪道士曰能相師乎瞻曰何敢

於是師事之道士命瞻曰山棲求道無必裹巾瞻遂了

髻布衣隨道士入羅浮山初瞻與瞻俱讀書為文而瞻

性唯高上瞻情慕榮達瞻嘗謂瞻曰鄙必不第則逸於

山野爾得第則勞於塵俗竟不及於鄙也然慎於富貴

四十年後當驗矣瞻曰神仙遐遠難求秦皇漢武非不

區區也廊廟咫尺易致馬周張嘉貞可以繼踵矣自後
贍愈精思於道乃隱於羅浮贍進士登科屢歷清顯及
昇輔相頗著調燮之稱俄謫日南行次廣州朝臺泊舟
江濱忽有丫角布衣少年衝暴雨而來衣履不濕云欲
見贍左右皆訝乃詰之但言宜哥來也以白贍問形狀
具以對贍驚嘆乃迎入見之贍顏貌可二十來贍以皤然
衰朽方為逐臣悲喜不勝贍復勉之曰與予為兄弟手
足所痛曩日之言今四十年矣贍亦感歎謂贍曰可復

修之否瞻曰身邀榮寵職和陰陽用心動靜能無損乎
自非茅家阿兄已昇天仙詎能救爾今唯來相別非來
相救也於是同舟行別話平生隔闊之事一夕失瞻所
在今羅浮山中時有見者瞻遂南適歿於貶所矣出續仙傳

盧鈞

唐相國盧公鈞進士射策為尚書郎以疾出為均州刺
史到郡疾稍加羸瘠不耐見人常於郡後山齋養性獨
處左右接待亦皆遠去非公呼召莫敢前也忽一人衣

飾敝故踰垣而入云姓王問其所自云山中來公笑而謂之曰即王山人也此來何以相教王曰公之貴位極人臣而壽不永災運方深由是有沉綿之疾故相救耳山齋無水公欲召人取湯茶之屬王止之以腰巾蘸於井中解丹一粒挾腰巾之水以咽丹與之約曰此後五日疾當愈矣康愈倍常後三年當有大厄勤立陰功救人憫物為意此時當再相遇在夏之初也自是盧公疾愈旬日平復明年解印還京署鹽鐵判官夏四月於務

本東門道左忽見山人尋至盧宅喜而言曰君今年第二限終為災極重也以君為郡去年雪窪獄活三人之命災已息矣今此月內三五日小不康而已固無憂也翌日山人使二僕持錢十千於狗脊坡分施貧病而已自此復去云二十三年五月五日午時可令一道士於萬山頂相候此時君節制漢土當有月華相授勿愆期也自是公揚歷清切便蕃貴盛後出鎮漢南之明年己二十三年矣及期命道士牛知微五日午時登萬山之

項山人在焉以金丹二使知微吞之謂曰子有道氣而
寡陰功未契道品更宜勤修也以金丹十粒令授於公
曰當享上壽無忘修鍊世限既畢佇還蓬宮耳與知微
揖別忽不復見其後知微年八十餘狀貌常如三十許
盧公年九十耳目聰明氣力不衰既終之後異香盈室
矣

出神仙傳

薛逢

河東薛逢咸通中為綿州刺史歲餘夢入洞府殼饌甚

多而不覩人物亦不敢饗之乃出門有人謂曰此天倉也及明詰於賓友或曰州界有昌明縣有天倉洞中自然飲食往往遊雲水者得而食之即使道士孫靈諷與親吏訪焉入洞可十許里猶須執炬十里外漸明朗又三五里豁然與人世無異崖室極廣可容千人其下平整有石牀羅列上飲食名品極多皆若新熟軟美甘香靈諷拜而食之又別開三五所請以奉薛公為信及齋出洞門形狀宛然皆化為石矣洞中左右散麵溲麵堆

鹽積既不知紀極又行一二里溪水迅急既濶且深隔
溪見山川居第歷歷然不敢渡而止近岸砂中有履跡
往來皆二三尺纔知有人行處薛公聞之歎異靈勝而
莫窮其所以也余按地輿志云少室山有自然五穀甘
果神芝仙藥周太子晉學道上仙有九十年資糧留於
山中少室在嵩山西十七里從東南上四十里為下定思
上十里為上定思十里中有大石門為中定思自中定思西
出至崖頭下有石室中有水多白石英室內有自然經

書自然飲食與此無異又天台山東有洞入十餘里有居人市肆多賣飲食乾符中有遊僧入洞經歷市中饑甚聞食香買蒸餅啗之同行一僧服氣不食飯行十餘里出洞門已在青州牟平縣而食僧俄變為石以此言之王烈石髓張華龍膏得食之者亦須累積陰功天挺仙骨始可上登仙品若常人啗之必化而為石矣出神仙感遇傳

費冠卿

費冠卿池州人也進士擢第將歸故鄉別相國鄭公餘

慶公素與秋浦劉令友善喜費之行託以寓書焉手札盈幅緘以授費戒之曰劉令久在名場所以不登甲乙之選者以其褊率不拘於時捨科甲而就卑宦可善遇之也費因請公畧批行止書末貴其因所慰薦稍垂青眼公然之發函批數行復緘如初費至秋浦先投刺於劉劉閱刺委諸案上畧不顧盼費悚立俟命久而無報疑其不可也即以相國書授閻者劉發緘覽畢慢罵曰鄭某老漢用此書何為劈而棄之費愈懼排闥而入趨

拜於前劉忽憫然顧之揖坐與語日暮矣劉促令排店
費曰日已昏黑或得逆旅之舍亦不及矣乞於廳廡之
下席地一宵明日徐詣店所即自解囊裝舒氈席於地
劉即拂衣而入良久出曰此非待賓之所有閣子中既而
閉門鐸繫甚嚴費莫知所以據榻而息是夕月明於門
窓中窺其外悄然無聲見劉令自執籧畚掃除堂之內
外庭廡陛壁靡不周悉費異其事危坐屏息不寐而伺
焉將及一更忽有異香之氣郁烈殊常非人世所有良

久劉執版恭立於庭似有所候香氣彌甚即見雲冠紫
衣仙人長八九尺數十人擁從而至劉再拜稽首此仙
人直詣堂中劉立侍其側俄有筵席羅列餚饌奇果香聞
閣下費聞之已覺氣清神爽須臾奏樂飲酒命劉令布
席於地亦侍飲焉樂之音調亦非人間之曲仙人忽問
劉曰得鄭某信否對曰得信甚安頃之又問得鄭某書
否對曰費冠卿先輩自長安來得書笑曰費冠卿且喜
及第也今在此邪對曰在仙人曰吾未合與之相見且

與一杯酒但向道早修行即得相見矣即命劉酌酒一杯送閣子中費窺見劉自呷酒半盃即以階上盆中水投杯中疑而未飲仙人忽下階與徒從乘雲而去劉拜辭嗚咽仙人戒曰爾見鄭其但令修行即當相見也既去劉郎詣閣中見酒猶在驚曰此酒萬刦不可一遇何不飲也引而飲之費力爭得一兩呷劉郎與冠卿為修道之友卜居九華山以左拾遺徵竟不起鄭相國尋亦去世劉費頗秘其事不知所降是何真仙也

出神仙傳

沈彬

吳興沈彬少而好道及致仕歸高安恒以朝修服餌為事嘗遊郁木洞觀忽聞空中樂聲仰視雲際見女仙數十冉冉而下逕至觀中徧至像前焚香良久乃去彬匿室中不敢出既去入殿視之几案上皆有遺香彬悉取置爐中已而自悔曰吾生平好道今見神仙而不能禮謁得仙香而不能食之是其無分歟初彬恒誠其子云吾所居堂中正是吉地即葬之及卒如其言掘地得自

然磚壩製作甚精磚上皆作吳興字彬年八十餘卒後

豫章有漁人投生米於潭中捕魚不覺行遠忽入一石

門煥然明朗行數百步見一白鬚翁諦視之頗類於彬

謂漁人曰此非爾所宜來速出猶可漁人遽出登岸云

入水已三日矣故老有知者云此即西仙天寶洞之南

門也

出稽
神錄

太平廣記卷五十四

欽定四庫全書

太平廣記卷五十五

神仙五十五

寒山子

軒轅彌明

蔡少霞

鄭居中

伊用昌

寒山子

寒山子者不知其名氏大歷中隱居天台翠屏山其山深邃當暑有雪亦名寒岩因自號寒山子好為詩每得

一篇一句輒題於樹間石上有好事者隨而錄之凡三百餘首多述山林幽隱之興或譏諷時態能警勵流俗
桐柏徵君徐靈府序而集之分為三卷行於人間十餘年忽不復見咸通十二年毘陵道士李褐性褊急好凌侮人忽有貧士詣褐乞食褐不之與加以叱責貧者唯唯而去數日有白衣從白衣者共七人詣褐褐禮接之因問褐曰頗相記乎褐視其狀貌乃前之貧士也逡巡欲謝之慙未發言忽語褐曰子修道未知其門而好凌

人侮俗何道可冀乎子頗知有寒山子邪答曰知曰即
吾是矣吾始謂汝可教今不可也修生之道除嗜去欲
審神抱和所以無累也內抑其心外檢其身所以無過
也先人後己知柔守謙所以安身也善推於人不善歸
諸身所以積德也功不在大立之無怠過不在大去而
不貳所以積功也然後內行充而外丹至可以冀道於
鬚髮耳子之三毒未翦以冠簪為飾可謂虎豹之尊而犬
豕之質也出門乘馬而去竟不復見

出仙傳
拾遺

軒轅彌明

軒轅彌明者不知何許人在衡湘間來往九十餘年喜
捕逐鬼物能囚拘蛟螭虎豹人莫知其壽進士劉師服
常於湘南遇之元和七年壬辰十二月四日將自衡山
遊太白還京師與師服相值師服招其止宿有校書郎
侯喜新有詩名擁爐夜坐與劉說詩彌明在其側貌極
醜白鬚黑面長頸而高結喉中又作楚語喜視之若無
人彌明忽掀衣張眉指爐中古鼎謂喜曰子云能詩與我

賦此乎師服以衡湘舊識見其老貌頗敬之不知其有文也聞此說大喜即援筆而題其首兩句曰巧匠琢山骨剗中事煎烹次傳與喜喜踊躍而綴其下曰外芭乾蘇文中有暗浪驚題訖吟之彌明啞然笑曰子詩如是而已乎即袖手竦肩倚北牆坐謂劉曰吾不解世俗書子為吾書之因高吟曰龍頭縮菌蠹豕腹脹彭亨初不似經意詩旨有似譏喜二子相顧慙駭然欲以多窮之即賦兩句以授喜曰大若烈士胆圓如戴馬纓喜又成

兩句曰在冷足自安遭焚意彌貞彌明又令師服書曰
秋瓜未落蒂凍芋強抽萌師服又吟曰磨礲去圭角淳
潤著光精訖又授喜喜思益苦務欲壓彌明每營度欲
出口吟吟聲益悲操筆欲書將下復止亦竟不能奇曰
旁有雙耳穿上為孤髻擰吟竟彌明日時於蚯蚓竅微
作蒼蠅聲其不用意如初所言益奇不可附說語皆侵
二子夜將闌二子起謝曰尊師非常人也某等伏矣願
為弟子不敢更詩彌明奮曰不然此章不可以不成也

謂劉曰把筆把筆吾與汝就之即又連唱曰何當出灰
烛無計離餅鑿謬居鼎鼐間長使水火爭形模婦女笑
度量兒童輕徒爾堅貞性不過升合盛寧依煖熱敝不
與寒涼并忽罹翻溢愆實負任使誠陋質荷斟酌狹中
愧提擎豈能煮仙藥但未汚羊羹區區徒自傲瑣瑣安
足呈難比俎豆用不為手所橙願君勿嘲誚此物方施
行師服書訖即使讀之畢謂二子曰此皆不足與語此
寧為文耶吾就子所能而作耳非吾之所學於師而能

者也吾所能者子皆不足以聞也豈獨文乎哉吾閉口矣
二子大懼皆起立牀下拜曰不敢他有問也願一言而已
先生稱吾不解人間書敢問解何書請聞此而已累問不
應二子不自得即退就坐彌明倚牆睡鼻息如雷鳴二子
但恐失色不敢喘息斯須曙鼓擊鼓二子亦困遂坐睡及
覺驚顧已失彌明所在問童奴曰天且明道士起出門
若將便旋然久不返覓之已不見矣二子驚惋自責因
携詩詣昌黎韓愈問此何人也愈曰余聞有隱君子彌

明豈其人耶遂為石鼎聯句序行於代焉

出仙傳拾遺

蔡少霞

蔡少霞者陳留人也性情恬和幼而奉道早歲明經得第選蘄州參軍秩滿漂寓江浙間久之再授兗州泗丞遂於縣東二十里買山築室為終焉之計居處深僻俯瞰龜蒙水石雲霞境象殊勝少霞世累早絕尤諧夙尚偶一日沿溪獨行忽得美蔭因憩焉神思昏然不覺成寐因為褐衣鹿幘之人夢中召去隨之遠遊乃至城

郭一所碧天虛曠瑞日瞳曨人俗潔淨卉木鮮茂少霞
舉目移足惶惑不寧即被導之令前經歷門堂深邃莫
測遙見玉人當軒獨立少霞遽修敬謁玉人謂曰愍子
虔心今宜領事少霞靡知所謂復為鹿幘人引至東廊
止於石碑之側謂少霞曰召君書此賀遇良因少霞素
不工書即極辭讓鹿幘人曰但按文而錄胡乃拒違俄
有二童自北而來一捧牙箱內有兩幅紫絹文書一齋
筆硯即付少霞凝神搦管頃刻而畢因覽讀之已記於

心矣題云蒼龍溪新宮銘紫陽真人山玄卿撰良常西
麓源澤東洩新宮宏宏崇軒轎轔雕珉盤礎鏤檀棟泉
碧瓦鱗差瑤階肪截閣凝瑞霞樓橫祥霓騶虞巡徼昌
明捧闌珠樹規連玉泉矩洩靈飈遐集聖日俯晰太上
游詣無極便闢百神守護諸真班列仙翁鵠立道師水
潔飲玉成漿饌瓊為屑桂旗不動蘭幄互設妙樂競奏
流鈴間發天籟虛徐風簫冷澈鳳歌諧律鶴舞會節三
變玄雲九成絳雪易遷徒語童初詎說方更周視遂為

鹿牘人促之勿遽而返醒然遂寤急命紙筆登即紀錄
自是充豫好奇之人多詣少霞謁訪其事有鄭還古者
為立傳焉且少霞乃孝廉一叟耳固知其不妄矣出集異記

鄭居中

鄭舍人居中高雅之士好道術常遇張山人者多同遊
處人但呼為小張山人亦不知其所能也居襄漢間除
中書舍人不就開成二年春往東洛嵩岳携家僮三四
人與僧登歷無所不到數月淹止日晚至一處林泉秀

潔愛甚忘返會院僧不在張燭熟火將宿遣僕者求之
兼取筆似欲為詩者操筆之次燈滅火盡一僮在側聞
鄭公仆地之聲喉中氣麤有光如雞子遙逕而出遽吹
薪照之已不救矣紙上有四字云香火願畢畢字僅不
成後居山者及獵人時見之衣服如遊涉之狀當應是
張生潛出言其終竟之日鄭公捨家以避耳若此豈非

達命者歟

出史逸

伊用昌

熊瞰補闕說頃年有伊用昌者不知何許人也其妻甚少有殊色音律女工之事皆曲盡其妙夫雖饑寒丐食終無愧意或有豪富子弟以言笑戲調常有不可犯之色其夫能飲多狂逸時人皆呼為伊風子多遊江左廬陵宜春等諸郡出語輕忽多為衆所歐擊愛作望江南詞夫妻唱和或宿於古寺廢廟間遇物即有所詠其詞皆有旨熊只記得詠鼓詞云江南鼓梭肚兩頭欒釘着不知侵骨髓打來只是沒心肝空腹被人漫餘多不記

江南有芒草貧民採之織屨緣地土卑濕此草耐水而
貧民多着之伊風子至茶陵縣門大題云茶陵一道好
長街兩畔栽柳不栽槐夜後不聞更漏鼓只聽鎚芒織
草鞋時縣官及胥吏大為不可遭衆人亂敲逐出界江南
人呼輕薄之詞為覆窠其妻告曰常言小處不要覆窠
而君須要覆窠之譬言如騎惡馬落馬足穿鎧非理傷墮
一等君不用苦之如是夫妻俱有輕薄之態天祐癸酉
年夫妻至撫州南城縣所有村民斃一犢夫妻丐得牛

肉一二十觔於鄉校內烹炙一夕俱食盡至明夫妻為
肉所脹俱死於鄉校內縣鎮吏民以蘆蓆裹尸於縣南
路左百餘步而瘞之其鎮將姓丁是江西廉使劉公親
隨一年後得替歸府劉公已薨忽一旦於北市棚下見
伊風子夫妻唱望江南詞乞錢既相見甚喜便叙舊事
執丁手上酒樓三人共飲數斛丁大醉而睡伊風子遂
索筆題酒樓壁云此生生在此生先何事從玄不復玄
已在淮南雞犬後而今便到玉皇前題畢夫妻連臂高

唱而出城遂渡江至遊帷觀題真君殿後其街云定億
萬兆恒沙軍國主南方赤龍神王伊用昌詞云日日祥雲
瑞氣連應儂家作大神仙筆頭灑起風雷力劍下驅馳造
化權更與戎夷添禮樂永教邊塞絕烽烟列仙功業只
如此直上三清第一天題罷連膺入西山時人皆見躡
虛而行自此更不復出其丁將於酒樓上醉醒懷內得
紫金一十兩其金並送在淮海南城縣後人開其墓只
見蘆席兩領裏爛牛肉十餘觔臭不可近餘更無別物

熊言六七歲時猶記識伊風子或着道服稱伊尊師熊嘗於頂上患一癰癧疼痛不可忍伊尊師含三口水噀其癰便潰並不為患至今尚有痕在熊言親覩其事非謬說也

出玉堂
聞話

太平廣記卷五十五

欽定四庫全書

太平廣記卷五十六

女仙一

西王母

上元夫人

雲華夫人

玄天二女

西王母

西王母者九靈太妙龜山金母也一號太虛九光龜臺
金母元君乃西華之至妙洞陰之極尊在昔道氣凝寂

湛體無為將欲啟迪玄功化生萬物先以東華至真之氣化而生木公木公生於碧海之上蒼靈之墟以主陽和之氣理於東方亦號曰東王公焉又以西華至妙之氣化而生金母金母生於神州伊川厥姓緱氏生而飛翔以主元毓神玄奧於眇莽之中分大道醇精之氣結氣成形與東王公共理二氣而養育天地陶鈞萬物矣柔順之本為極陰之元位配西方母養羣品天上天下三界十方女子之登仙者得道者咸所隸焉所居宮闕

在龜山春山西那之都崑崙之圓閣風之苑金城千重
玉樓十二瓊華之闕光碧石之堂九層玄臺紫翠丹房左
帶瑤池右環翠水其山之下弱水九重洪濤萬丈非麌
車羽輪不可到也所謂玉闕暨天綠臺承霄青琳之宇
朱紫之房連琳綵帳明月四朗戴華勝佩虎章左侍仙
女右侍羽童寶蓋沓映羽摺蔭庭軒砌之下植以白環
之樹丹剛之林空青萬條瑤幹千尋無風而神籟自韻
琅琅然皆九奏八會之音也神州在崑崙之東南故爾

雅云西王母日下是矣又云王母蓬髮戴華勝虎齒善
嘯者此乃王母之使金方白虎之神非王母之真形也
元始天王授以萬天元統龜山九光之錄使制召萬靈
統括真聖監盟證信總諸天之羽儀天尊上聖朝宴之
會考校之所王母皆臨訣焉上清寶經三洞玉書凡有
授度咸所關預也黃帝討蚩尤之暴威所未禁而蚩尤
幻化多方徵風召雨吸烟噴霧師衆大迷帝歸息太山
之阿昏然憂寢王母遣使者被玄狐之裘以符授帝曰

太一在前天一在後得之者勝戰則克矣符廣三寸長
一尺青瑩如玉丹血為文佩符既畢王母乃命一婦人
人首鳥身謂帝曰我九天玄女也授帝以三宮五意陰
陽之畧太乙遁甲六壬步斗之術陰符之機靈寶五符
五勝之文遂克蚩尤於中冀翦神農之後誅榆罔於阪
泉天下大定都于上谷之涿鹿又數年王母遣使白虎
之神乘白鹿集于帝庭授以地圖其後虞舜攝位王母
遣使授舜白玉環舜即位又受益地圖遂廣黃帝之九

州為十有二州王母又遣使獻舜白玉琯吹之以和八
風尚書帝驗期曰王母之國在西荒之野昔茅盈字叔申
王褒字子登張道陵字輔漢洎九聖七真凡得道受書
者皆朝王母於崑陵之闕焉時叔申道陵侍太上道君
乘九蓋之車控飛虬之軒越積石之峯濟弱流之津浮
白水凌黑波顧盼倏忽詣王母於闕下子登清齋三月
王母授以瓊華寶曜七辰素經茅君從西城王君詣白
玉龜臺朝謁王母求長生之道曰盈以不肖之軀慕龍

鳳之年欲以朝菌之脆求積朞之期王母愍其勤志告
之曰吾昔師元始天王及皇天扶桑帝君授我以玉佩
金璫二景纏煉之道上行太極下造十方溉月咀日入
天門名曰玄真之經今以授爾宜勤修焉因勅西城王
君一一解釋以授焉又周穆王時命八駿與七萃之士
使造父為御西登崑崙而賓於王母穆王持白珪重錦
以為王母壽事具周穆王傳至漢武帝元封元年七月
七日夜降於漢宮語在漢武帝傳內此不復載焉

出集仙錄

上元夫人

上元夫人道君弟子也亦古以來得道總統真籍亞
於龜臺金母所降之處多使侍女相聞已為賓侶焉漢
孝武皇帝好神仙之道禱醮名山以求靈應元封元年
辛未七月七日夜二唱之後西王母降於漢宮帝迎拜
稽首侍立久之王母呼帝令坐食以天厨筵宴麌悉命
駕將去帝下席叩頭請留慇勤王母復坐乃命侍女郭
密香邀夫人同宴於漢宮語在漢武帝傳中其後漢宣

帝地節四年乙卯咸陽茅盈字叔申受黃金九錫之命
為東岳上卿司命真君太元真人是時五帝君授冊既
畢各昇天而去茅君之師乃總真王君西靈王母與夫
人降於旬曲之山金壇之陵華陽天宮以宴茅君焉時
茅君中君名固字季偉小君名衷字思和王母王君授
以靈訣亦受錫命紫素之冊固為定錄君衷為保命君
亦侍貞會王君告二君曰夫人乃三天真皇之母上元
之高尊統領十方玉女之籍汝可自陳二君下席再拜

求乞長生之要夫人憫其勤志命侍女宋辟非出紫錦
之囊開綠金之笈以三元流珠經丹景道精經隱地八
術經太極緣景經凡四部以授二君王母復勅侍女李
方明出丹瓊之函披雲珠之笈出玉佩金瑞經太霄隱
書經洞飛二景內書傳司命君各授書畢王母與夫人
告去千乘萬騎昇還太空矣出漢武內傳

雲華夫人

雲華夫人王母第二十三女太真王夫人之妹也名瑤

姬受徊風混合萬景鍊神飛化之道嘗東海遊還過江
上有巫山焉峰巖挺拔林壑幽麗巨石如壇留連久之
時大禹理水駐山下大風卒至崖振谷隕不可制因與
夫人相值拜而求助即敕侍女授禹策召鬼神之書因
命其神狂章虞余黃魔大翳庚辰童律等助禹斲石疏
波決塞導阨以猶其流禹拜而謝焉禹嘗詣之崇嶧之
巔顧盼之際化而為石或倏然飛騰散為輕雲油然而
止聚為夕雨或化遊龍或為翔鶴千態萬狀不可親也

禹疑其狡猾怪誕非真仙也問諸童律律曰天地之本者道也運道之用者聖也聖之品次真人仙人也其有稟氣成真不修而得道者木公金母是也蓋二氣之祖宗陰陽之原本仙真之主宰造化之元光雲華夫人金母之女也昔師三元道君受上清寶經受書於紫清闕下為雲華上宮夫人主領教童真之士理在玉英之臺隱見變化蓋其常也亦由凝氣成貞與道合體非寓胎稟化之形是西華少陰之氣也且氣之彌綸天地經營

動植大包造化細入毫髮在人為人在物為物豈止於
雲雨龍鶴飛鴻騰鳳哉禹然後往詣焉忽見雲樓玉
臺瑤宮瓊闕森然既靈官侍衛不可名識獅子抱闌天
馬啟塗毒龍電獸八威備軒夫人宴坐于瑤臺之上禹
稽首問道召禹使坐而言曰夫聖匠肇興剖大混之一
樸發為億萬之體發大蘊之一苞散為無窮之物故步
三光而立乎晷景封九域而制乎邦國刻漏以分晝夜
寒暑以成歲紀兌離以正方位山川以分陰陽城郭以

聚民器械以衛衆輿服以表貴賤禾黍以備凶歉凡此之制上稟乎星辰而取法乎神真以養有形之物也是故日月有幽明生殺有寒暑雷震有出入之期風雨有動靜之常清氣浮乎上而濁衆散於下廢興之數治亂之運賢愚之質善惡之性剛柔之氣壽夭之命貴賤之位尊卑之叙吉凶之感窮達之期此皆稟之於道懸之於天而聖人為紀也性發乎天而命成乎人立之者天行之者道道存則有道去則無道非物不可存也非修

不可致也。老子有言：致虛極，守靜篤，萬物將自復。復謂歸於道而常存也。道之用也，變化萬端而不足其一。是故天參玄，地參混，黃人參道德。去此之外，非道也哉？長久之要者，天保其玄地，守其物，人養其氣，所以全也。則我命在我，非天地殺之，鬼神害之。失道而自逝也，至乎哉勤乎哉！予之功及於物矣，勤逮於民矣，善格乎天矣，而未聞至道之要也。吾昔於紫清之闕受書寶，而勤之。我師三元道君曰：上真內經，天真所寶，封之金臺，佩入。

太微則雲輪上往神武抱闕振衣瑤房邀宴希林左招
仙公右棲白山而下眄太空汎乎天津則乘雲騁龍遊
此名山則真人詣房萬人奉衛山精伺迎動有八景玉
輪靜則宴處金堂亦謂之太上玉佩金璫之妙文也汝
將欲越巨海而無飈輪渡飛砂而無雲軒陟阨塗而無
所舉涉泥波而無所乘陸則困於遠絕水則懼於漂淪
將欲以道百谷而濬萬川也危乎悠哉太上愍汝之至
亦將授以靈寶真文陸策虎豹水制蛟龍斷馘千邪檢

馭羣凶以成汝之功也其在乎陽明之天也吾所授寶書亦可以出入水火嘯叱幽冥收束虎豹呼召六丁隱淪八地顛倒五星久視存身與天相傾也因命侍女陵容華出丹玉之笈開上清寶文以授禹拜受而去又得庚辰虞余之助遂能導波決川以成其功奠五岳別九州而天錫玄珪以為紫庭真人其後楚大夫宋玉以其事言於襄王王不能訪道要以求長生築臺於高唐之館作陽臺之宮以祀之宋玉作神仙賦以寓情荒淫穢

蕪高真上仙豈可誣而降之也有祠在山下世謂之大
仙隔岸有神女之石即所化也復有石天尊神女壇側
有竹垂之若簷有槁葉飛物着壇上者竹則因風掃之
終瑩潔不為所汚楚人世祀焉出集仙錄


玄天二女

燕昭王即位二年廣延國來獻善舞者二人一名旋娟
一名提謨並玉質凝膚體輕氣馥綽約而窈窕絕古無
倫或行無影跡或積年不饑昭王處以單綃華幄飲以

璫珉之膏飴以丹泉之粟王登崇霞臺乃召二人來側時香風歛起徘徊翔舞殆不自支王以纓縷拂之二人皆舞容冶妖麗靡於翔鸞而歌聲輕颺乃使女伶代唱其曲清響流韻雖飄梁動塵未足加焉其舞一名縈塵言其體輕與塵相亂次曰集羽言其婉轉若羽毛之從風也末曰旋懷言其支體纏曼若入懷袖也乃設麟文之席散荃薰之香香出波弋國浸地則土石皆香着朽木腐草莫不蔚茂以薰枯骨則肌肉皆生以屑鋪地厚

四五寸使二人舞其上彌日無跡體輕故也時有白鸞
孤翔銜干莖穟穟於空中自生花實落地即生根葉一
歲百穫一莖滿車故曰盈車嘉穟麟文者錯雜衆寶以
為席也皆為雲霞麟鳳之狀昭王復以衣袖麾之舞者
皆止昭王知為神異處於崇霞之臺設枕席以寢謙遣
人以衛之王好神仙之術故玄天之女託形作二人昭
王之末莫知所在或遊於江漢或在伊洛之濱遍行天
下乍近乍遠也

出王子年拾遺記



太平廣記卷五十六

欽定四庫全書

太平廣記卷五十七

女仙二

太真夫人

萼綠華

太真夫人

太真夫人王母之小女也年可十六七名婉字羅敷遂事玄都太真王有子為三天太上府司直主總紀天曹之違錯比地上之卿佐年少好遊逸委官廢事有司奏

劾以不親局察降主事東岳退真王之編司鬼神之師
五百年一代其職夫人因來視之勵其使修守政事以
補其過過臨淄縣小吏和君賢為賊所傷殆死夫人見
愍問之君賢以實對夫人曰汝所傷乃重刃闌於肺腑
五臟泄漏血凝絳府氣激傷外此將死之厄也不可復
生如何君賢知是神人扣頭求哀夫人於肘後筒中出
藥一丸大如小豆即令服之登時而愈血絕創合無復
慘痛君賢再拜跪曰家財不足不知何以奉答恩施唯

當自展驚力以報所受耳夫人曰汝必欲謝我亦可隨去否君賢乃易姓名自號馬明生隨夫人執役夫人還入東岳岱宗山峭壁石室之中上下懸絕重岩深隱去地千餘丈石室中有金床玉几珍物奇瑣人跡所不能至明生初但欲學受金創方既見神仙來往及知有不死之道旦夕供給掃灑不敢懈倦夫人亦以鬼怪虎狼及眩惑衆變試之明生神情澄正終不恐懼又使明生他行別宿因以好女戲調親接之明生心堅靜固無邪

念夫人他行去十日五日一還或一月二十日輒見有仙人賓客乘龍騎駕虎豹往來或有拜謁者真仙彌日盈坐客到輒令明生出外別室中或立致精細厨食殼果香酒奇漿不可名目或呼坐與之同飲食又聞空中有琴瑟之音歌聲婉妙夫人亦時自彈琴有一絃而五音並奏高朗響激聞於數里衆鳥皆聚集於岫室之間徘徊飛翔驅之不去殆天人之樂自然之妙也夫人棲止常與明生同石室中而異榻坐寂之所唯二人或行

去亦不道所往但見常有一白龍來迎夫人即着雲光
繡袍乘龍而去袍上專是明月珠綵衣領帶玉佩戴金
華太玄之冠亦不見有從者既還龍即自去所居石室
玉床之上有紫錦被褥紫羅帳帳中服玩瑰金函玉玄
黃羅列非世所有不能一一知其名也有兩卷素書題
曰九天太上道經明生亦不敢發視其文唯供灑掃守
巖室而已如此五年愈加勤肅夫人歎而謂之曰汝真
可教必能得道者也以子俗人而不淫不慢恭仰靈氣

終莫之廢雖欲求死焉可得乎因以姓氏本末告之曰
我久在人間今奉天皇命又按太上召不復得停念汝
專謹故以相語欲教汝長生之方延年之術而我所受
服以太和自然龍胎之醴適可授三天真人不可以教
始學固非汝所得聞縱或聞之亦不能用以持身也有
安期先生燒金液丹法其方秘要立可得用是元君太
乙之道自日昇天者矣明日安期當來吾將以汝付囑
焉汝相隨稍久其術必傳明日安期先生果至乘駿驥

著朱衣遠遊冠帶玉佩及虎頭般革囊視之年可二十
許潔白嚴整從可六七仙人皆執節奉衛見夫人拜揖
甚敬自稱下官須臾設酒果厨膳飲宴半日許安期自
說昔與夫人遊安息國西海際食棗異美此間棗殊不
及也憶此未久已二千年矣夫人云吾昔與君共食一
棗乃不盡此間小棗那可比耶安期曰下官先日往九
河見司陰與西漢夫人共遊見問以陽九百六之期聖
主受命之劫下官答以幼稚未識運厄之紀別當諮太

真王夫人今既賜坐願請此數夫人曰期運漫汗非君所能卒知夫天地有大陽九大百六小陽九小百六天厄謂之陽九地虧謂之百六此二災是天地之否泰陰陽九氣之孚蝕也大期九千九百年小期三千三十年而此運所鍾聖人所不能禳今大厄猶未然唐世是小陽九之始計訖來甲申歲百六將會矣爾時道德方隆凶惡頓肆聖君受命乃在壬辰無復千年亦尋至也西漢夫人俱已經見所以相問當是相試耳然復是司陰

君所局夫陽九者天旱海消而陸自憇百六者海竭而
陵自填四海水減滄溟成山連城之鯨萬丈之鯀不達
期運之度唯叩天而索水詞訟紛紜布於上府三天煩
於省察司命亦疲於按對九河之口是赤水之所衝其
深難測今已漸枯八氣蒸於山澤流沙塵於原口於是
四海俱會羣龍鼓舞余乃須甲申之年將飛洪倒流今
水母上天門而告期積石開萬泉而通路飛陰風以撓
蒼生注玄流以布遐邇洋溢在數年之中漫衍終九載

之暮既得道之真體靈合妙至其時也但當騰虛空而
盼山陂遊浮岳而視廣川乘玄鴻以湊州城御虬輦而
邁景雲耳咄嗟之間忽焉便適可以翱身娛目豈足經
意乎當今日且論酒事何用此為也因指明生向安期
曰此子有心向慕殆可教訓昔遇因緣遂來見隨雖質
穢未靈而淫欲已消今未可授玄和太真之道且欲令
就君受金液丹方君有得僉便宜將去夫流俗之人心
肺單危經胃內薄血津疲羸肝腎不注其眼唇口不辨

其機蓋大慈而不合天人欲奔走而不及靈飛適宜慰撫以成其志不可試以仙變八威也切勿刻令其失正矣安期曰諾但恐道淺術薄不足以訓授耳下官昔受此方於漢成丈人此則先師之成法實不敢倉卒而傳要當令在二千年之內必使其闢天路矣下官往與女郎俱會玄丘觀九陔之礪硌望弱水而東流賜酣玄碧之香酒不覺高卑而詠同當開尊笈靈籙偶見玉胎瓊膏之方服之刀圭立登雲天解形萬變上為真皇此術

徑妙蓋約於金液之華又速於霜雪九轉之鋒今非敢
有譏捨近而從遠棄逕而追煩實思聞神方之品第願
知真仙之高尊苟卑降有時非所宜論瓊腴之方必是
侍者未可得用邪夫人曰君未知乎此是天皇之靈方
乃天真所宜用非俗流下戶所能闖闖也仙方凡有九
品一名太和自然龍胎之醴二名玉胎瓊液之膏三名
飛丹紫華流精四名朱光雲碧之腴五名九種紅華神
丹六名太清金液之華七名九轉霜雪之丹八名九鼎

雲英九名雲光石流飛丹此皆九轉之次第也得仙者亦有九品第一上仙號天九真王第二次仙號三天真王第三號太上真人第四號飛天真人第五號靈仙第六號真人第七號靈人第八號飛仙第九號仙人此九仙之品第也各有差降不可超學彼知金液已為過矣至於玉皇之所餌非淺學所宜聞君雖得道而久在世上囂濁染於正氣塵垢鼓於三尸猶未可登三天而朝太上邁扶桑而謁太真玉胎之方尚未可諭何況下才

而令聞其篇目耶安期有慚色退席曰下官實不知靈藥之妙品殊乃爾信駭聽矣因自陳曰下官曾聞女郎有九天太真道經清虛鏡無鑒朗玄冥誠非下才可得仰瞻然受遇彌久接引每重不自省量希乞教訓不審其書可得見乎如暫覩盼太真則魚目易質矣夫人哂爾而笑良久曰太上道殊真府遐邈將非下才可得交闊君但當宏今之功無代非分之勞矣我正爾暫北到玄洲東詣方丈漱龍胎於玄都之宮試玉女於衆仙之

堂天事靡鹽將俟事暇相示以太上真經也君能勤正一於太清役恒華而命四瀆然後尋我於三天之丘見索於鍾山王屋則真書可得而授焉如其不然無為屈逸駿而步滄津損舟楫而濟溟海矣如向所論陽九百六應期輒降夫安危無專否泰有對超然遠鑒悵懷感慨亢極之災可避而不可禳明期運所鍾聖主不能知是以伯陽棄周闕令悟其國弊天人之事彰於品物君何為杳杳久為地仙乎孰若先覺以高飛超風塵而自

潔避甲申於亥涂並真靈而齊列乎言為僉盡君將勗
之安期長跪曰今日受教輒奉修焉夫人語明生曰吾
不得復停汝隨此君去勿憂念也我亦時當往視汝因
以五言詩二篇贈之可以相勗明生流涕而辭乃隨安
期負笈入女几山夫人乘龍而去後明生隨師周遊青
城廬潛凡二十年乃受金液之方鍊而昇天

出神
仙傳

萼綠華

萼綠華者女仙也年可二十許上下青衣顏色絕整以

晉穆帝昇平三年己未十一月十日夜降於羊權家自
云是南山人不知何仙也自此一月輒六過其家權字
道學即晉簡文黃門郎羊欣祖也權及欣皆潛修道要
耽玄味真綠華云我本姓楊又云是九嶷山中得道羅
郁也宿命時曾為其師母毒殺乳婦玄洲以先罪未滅
故暫謫降臭濁以償其過贈權詩一篇并火滌布手巾
一金玉條脫各一枚條脫似指環而大異常精好謂權
曰慎無泄我下降之事泄之則彼此獲罪因曰修道之

士視錦繡如弊帛視爵位如過客視金玉如礫石無思
無慮無事無為行人所不能行學人所不能學勤人所
不能勤得人所不能得何者世人行嗜欲我行介獨世
人行俗務我學恬淡世人勤聲利我勤內行世人得老
死我得長生故我行之已九百歲矣授權尸解藥亦隱
景化形而去今在湘東山中

出真語

太平廣記卷五十七

欽定四庫全書

太平廣記卷五十八

女仙三

魏夫人

魏夫人

魏夫人者任城人也晉司徒劇陽文康公舒之女名華
存字賢安幼而好道靜默恭謹讀莊老三傳五經百氏
無不該覽志慕神仙味真耽玄欲求冲舉常服胡麻散

茯苓丸吐納氣液攝生夷靜親戚往來一無闊見常欲
別居閑處父母不許年二十四強適太保掾南陽劉文
字幼彥生二子長曰璞次曰瑕幼彥後為修武令夫人
心期幽靈精誠彌篤二子竚立乃離隔宇室齋于別寢
將逾三月忽有太極真人安度明東華大神方諸青童
扶桑碧阿陽谷神王景林真人小有仙女清虛真人王
稟來降稟謂夫人曰聞子密綿真氣注心三清勤苦至
矣扶桑大帝君敕我授子神真之道青童君曰清虛天

王即汝之師也度明曰子苦心求道道今來矣景林真人曰虛皇鑒爾勤感太極已注予之仙名於玉札矣予其勗哉青童君又曰予不更聞上道內晨景玉經者仙道無緣得成後日當會陽濂山中爾謹密之王君乃命侍女華散條李明允等便披雲蘊開玉笈出太上寶文八素隱書大洞真經靈書八道紫度炎光石精金馬神真虎文高仙羽玄等經凡三十一卷即手授夫人焉王君因告曰我昔於此學道遇南極夫人西城王君授我

寶經三十一卷行之以成真人位為小有洞天仙王今
所授者即南極元君西城王君之本文也此山洞臺乃
清虛之別宮耳於是王君起立北向執書而祝曰太上
三元九星高真虛微入道上清玉晨禳為太帝所敕使
教于魏華存是月丹良吉日戊申謹按寶書神金虎文
大洞真經八素玉篇合三十一卷是禳昔精思於陽明
西山受真人太師紫元夫人書也華存當謹按明法以
成至真誦修虛道長為飛仙有泄我書族及一門身為

下鬼塞諸河源九天有命敢告華存祝畢王君又曰我
受秘訣於紫元君言聽教於師云此篇當傳諸真人不
但我得而已子今獲之太帝命焉此書自我當七人得
之以白玉為簡青玉為字至華存則為四矣於是景林
又授夫人黃庭內景經令晝夜存念讀之萬遍後乃能
洞觀鬼神安適六府調和三魂五臟生華色反嬰孩乃
不死之道也於是四真吟唱各命玉女彈琴擊鐘吹簫
合節而發歌歌畢王君乃解摘經中所修之節度及寶

經之指歸行事之口訣諸要備訖徐乃別去是時太極真人命北寒玉女宋暎涓彈九氣之璈青童命東華玉女烟景珠擊西盈之鐘暘谷神王命神林玉女賈屈廷吹鳳唳之簫清虛真人命飛玄玉女鮮于虛拊九合玉節太極真人發排空之歌青童吟太霞之曲神王諷晨啓之章清虛詠駕飈之詞既散後諸真元君日夕來降雖幼彥隔壁寂然莫知其後幼彥物故值天下荒亂夫人撫養內外旁救窮乏亦為真仙默示其兆知中原將

亂携二子渡江璞為庾亮司馬又為溫太真司馬後至安成太守遐為陶太尉侃從事中郎將夫人自洛邑達江南盜寇之中凡所過處神明保佑常果元吉二子位既成立夫人因得冥心齋靜累感真靈修真之益與日俱進凡住世八十三年以晉成帝咸和九年歲在甲午王君復與青童東華君來降授夫人成藥二劑一曰遷神白騎神散一曰石精金光化形靈丸使頓服之稱疾不行凡七日太乙玄仙遣飈車來迎夫人乃託劍化形

而去徑入陽洛山中明日青童君太極四真人清虛王
君令夫人清齋五百日讀大洞真經併分別真經要秘
道陵天師又授明威章奏存祝吏兵符籙之訣衆真各
標至訓三日而去道陵所以徧教委曲者以夫人在世
當為女官祭酒領職理民故也夫人誦經萬遍積十六
年顏如少女於是龜山九虛太真金母金闕聖君南極
元君共迎夫人白日昇天北詣上清宮玉闕之下太微
帝君中央黃老君三素高元君太上玉晨太道君太素

三元君扶桑太帝君金闕後聖君各令使者致命授夫人玉札金文位為紫虛元君領上真司命南岳夫人比秩仙公使治天台大霍山洞臺中主下訓奉道教授當為仙者男曰真人女曰元君夫人受錫事畢王母及金闕聖君南極元君各去使夫人於王屋小有天中更齋戒二月畢九微元君龜山王母三元夫人衆諸真仙並降於小有清虛上四奏各命侍女陳鈞成之曲九靈合節八音靈際王母擊節而歌三元夫人彈雲璈而答歌

餘真各歌須臾司命神仙諸隸屬及南岳迎官並至虎
旂龍輦激耀百里中王母諸真乃共與夫人東南而行
俱詣天台霍山臺又便道過句曲金壇茅叔申宴會二
日二夕共適于霍山夫人安駕玉宇然後各別初王君
告夫人曰學者當去疾除病因授甘草穀仙方夫人服
之夫人能隸書小有王君並傳事甚詳悉又述黃庭內
景注叙青精餽飯方後屢降茅山子璞後至侍中夫人
令璞傳法于司徒瑯琊王舍人楊義護軍長史許穆穆

子玉斧並皆昇仙陶貞白真誥所呼南真即夫人也以
晉興寧三年乙丑降楊家謂楊君曰修道之士不欲見
血肉見雖避之不如不見又云向過東海中波聲如雷
又云裴清靈真人錦囊中有寶神經昔從紫微夫人所
受吾亦有是西宮定本即是玄圃北壇西瑤之上臺天
真珍文盡藏其中也因授書云若夫仰擲雲輪總轡太
空手携宵烟足陟王庭身昇帝闕披寶旛青論九玄之
逸度沉萬椿之長生真言玄朗高譚玉清今則廻靈塵

埃訓我弟子周目五濁勞神臭腥子所營者道研詠者
妙道妙既得吾子加之慮斯蕩散念且慎之仍云河東
桐栢山之西頭適崩二百餘丈吾昨與茅叔申詣清虛
宮授真仙之籍得失之事頓落四十七人復上者三人
耳固當洗心虛邁勤注理盡心殫意竭如履冰火久久
如此仙道亦不隱矣但在莊敬丹到而絕淫色之念也
若抱淫慾之心行上真之道者清宮所落皆此輩也豈
止落名生籍方將被考於三官也勉之慎之宗道者貴

無邪棲真者安恬愉至寂非引順之主淡然非教授之匠故當因煩以領無耳爲道者精則可矣有精而不勤能而不專無益也要在恬心消豁穢念疾開可以數看東山勤望三秀差復益耳言者性命之全敗信者得失之關籥張良三期可謂篤道而明心矣又曰得道去世或顯或隱託體遺跡者道之隱也昔有再酣瓊液而叩棺一服刀圭而尸爛鹿皮公吞玉華而流虫出戶賈季子咽金液而臭聞百里黃帝火九鼎於荆山尚有喬嶺

之墓李玉服雲散以潛昇猶頭足異處墨狄飲虹丹以
沒水寧生服石腦而赴火務光翦薤以入清冷之泉栢
成納氣而腸胃三腐如此之比不可勝紀微乎得道趣
捨之迹固無常矣保命君曰所謂尸解者假形而示死
非真死也南真曰人死必視其形如生人者尸解也足
不青皮不皴者亦尸解也目光不落無異生人者尸解
也髮盡落而失形骨者尸解也白日尸解自是仙矣若
非尸解之例死經太陰暫過三官者肉脫脉散血沉灰

爛而五臟自生骨如玉七魄營侍三魂守宅者或三十年二十年十年三年當血肉再生復質成形必勝於昔日未死之容者此名鍊形太陰易貌三官之仙也天帝云太陰鍊身形勝服九轉丹形容端且嚴面色似靈雲上登太極闕受書為真人是也若暫遊太陰者太一守尸三魂營骨七魄侍肉胎靈錄氣皆數滿再生而飛天其用他藥尸解非是靈丸者即不得返故鄉三官執之也其死而更生者未殮而失其尸有形皮存而無者有

衣結不解衣存而形去者有髮脫而形飛者有頭斷已死乃從一旁出者皆尸解也白日解者為上夜半解者為下向晚向暮去者為地下主者此得道之差降也夫人之修道或災逼禍生形壞氣亡者似由多言而守一年多端而期苟免也是以層巢頽枝而墜落百勝失於一敗惜乎通仙之才安可為二豎子而致斃耶智以無涯傷性心以欲惡蕩真豈若守根靜中棲研三神彌貫萬物而洞玄鏡寂混然與泥丸為一而內外均福也真人

歸心於一任於永信心歸則正神和信順利真之兆自然之感無假兩際也若外見察觀之氣內有慍結之哂有如此者我見其敗未見其立地下主者乃下道之文官地下鬼師乃下道之武官文解一百四年一進武解倍之世人勤心於嗜慾兼味於清正華目以隨世畏死而希仙者皆多武解尸之最下也夫人與衆真吟詩曰玄感妙象外和聲自相招靈雲鬱紫晨蘭風扇綠輶上真宴瓊臺邈爲地仙標所期貴遠邁故能秀穎翹翫彼

八素翰道成初不遼人事胡可預使僉形氣消夫人既遊江南遂於撫州并山立靜室又於臨汝水西置壇宇歲久蕪梗踪跡殆平有女道士黃靈徽年邁八十貌若嬰孺號爲花姑特加修飾累有靈應夫人亦寓夢以示之後亦昇天玄宗敕道士蔡常編入後仙傳大歷三年戊申魯國公顏真卿重加修葺立碑以紀其事焉

出集仙錄

及本傳

太平廣記卷五十八